

《右繞佛塔功德經》

林崇安教授

(《大圓滿》，第 11 期，pp.15-17，2015.10)

一、前言

今日漢、藏、緬、泰等地都有許多佛塔，供信徒禮拜。佛陀入滅前告訴阿難說：「阿難！云何理由如來、阿羅漢、等正覺者值得造塔耶？若人思念：此是彼世尊、阿羅漢、等正覺者之塔者，阿難！則可使甚多之大眾，內心清淨。彼等於其處既得內心清淨，於身壞命終之後，能生於善趣、天界。」由此可知佛塔的重要威德，以下列出《右繞佛塔功德經》以資證明。此經是大周于闐國的三藏沙門實叉難陀等人所漢譯，編在《大正》16，No. 700。

二、《右繞佛塔功德經》經文

(1) 如是我聞：一時，佛在舍衛國祇樹給孤獨園，與大比丘僧及餘無量眾俱，前後圍繞。

(2) 爾時，長老舍利弗即從坐起，偏袒右肩，右膝著地，合掌向佛，以偈請曰：

大威德世尊！願為我等說，右繞於佛塔，所得之果報。

(3) 爾時，世尊以偈答曰：

右繞於佛塔，所得諸功德，我今說少分，汝等咸善聽：
一切諸天龍，夜叉鬼神等，皆親近供養，斯由右繞塔；
在在所生處，遠離於八難，常生無難處，斯由右繞塔；
於一切生處，念慧常無失，具足妙色相，斯由右繞塔；
往來天人中，福命悉長遠，常獲大名稱，斯由右繞塔；
在於閻浮提，常生最尊勝，清淨種姓中，斯由右繞塔；

儀貌常端正，富貴多財寶，恒食大封邑，斯由右繞塔；
財寶常盈積，而無慳悋心，勇猛廣惠施，斯由右繞塔；
色相淨微妙，見者皆欣仰，所住常安樂，斯由右繞塔；
或為忉利王，妻子悉具足，威勢力自在，斯由右繞塔；
或作婆羅門，持戒善通達，呪術圍陀典，斯由右繞塔；
或作大長者，豪貴多財產，倉廩常豐足，斯由右繞塔；
或作正法王，自在王閻浮，率土咸歸化，斯由右繞塔；
或為具七寶，大勢轉輪王，十善御群生，斯由右繞塔；
從此生天上，常有大威德，淨信於佛法，斯由右繞塔；
淨信速成已，於法無迷惑，見諸行皆空，斯由右繞塔；
從天上捨命，下生於人中，入胎不迷亂，斯由右繞塔；
在於母胎中，垢穢所不染，如淨摩尼珠，斯由右繞塔；
在胎及生時，令母常安樂，飲乳亦復然，斯由右繞塔；
父母及親戚，一切共鞠養，乳母常不離，斯由右繞塔；
眷屬皆愛念，超過於父母，資財自增長，斯由右繞塔；
夜叉諸惡鬼，不能暫驚怖，所須自然得，斯由右繞塔；
經於百千劫，其身轉清淨，妙色相成滿，斯由右繞塔；
淨眼修且廣，猶如青蓮花，兼得淨天眼，斯由右繞塔；
妙色常圓滿，諸相自莊嚴，成就大勢力，斯由右繞塔；
或生帝釋宮，大威勢自在，忉利天中尊，斯由右繞塔；
或生須夜摩，兜率陀天宮，化樂及他化，斯由右繞塔；
或復生梵天，梵世最自在，諸天常供養，斯由右繞塔；
億那由他劫，常為諸智人，恭敬而供養，斯由右繞塔；
其身及衣服，億劫常無垢，具足白淨法，斯由右繞塔；
具大精進力，勤修種種行，未嘗有疲懈，斯由右繞塔；
勇猛常精進，堅固不可壞，所作速成就，斯由右繞塔；
深遠微妙音，聞者皆歡喜，安樂常無病，斯由右繞塔；
如我所演說，厭捨三有苦，成就出世智，斯由右繞塔；
常在四念處，及以四正勤，四如意神足，斯由右繞塔；
了達四真諦，根力七覺分，正道及聖果，斯由右繞塔；
滅一切煩惱，具足大威德，無漏六神通，斯由右繞塔；
永離貪恚癡，及一切障礙，證獨覺菩提，斯由右繞塔；
得妙紫金色，相好莊嚴身，現作天人師，斯由右繞塔；
皆由以身業，及語業讚歎，右繞於佛塔，獲此大利益，

右繞諸佛塔，所得諸功德，我今隨所聞，略說詎能盡。

(4) 爾時，世尊說此偈已，舍利弗等一切眾會皆大歡喜，信受奉行。

三、結語

今日修行者所面臨的障礙很多，平時當右繞佛塔，累積功德；身壞命終前若未能證得道果，當發願生於善趣、天界，並繼續修行，最後將必獲得如《右繞佛塔功德經》所說的種種果報。
